

東光縣志卷之七

忠節

粵稽商紀之終篇三臣去國行事不同而孔子總斷之曰仁後之事君者或慷慨殺身或抗節不阿亦各成其仁耳東邑雖微如縮袁二氏劉氏祖孫跡其行事至今猶有生氣迺知萬世君臣之義未嘗一日不在人間後有興者景先哲以爲準勿讓美於前人可也

縮高 戰國

東光縣志

卷之七

一

縮高安陵人魏攻管不下高之子爲管守信陵君使人謂安陵君使其遣高安陵君辭使者自至高所將信陵君之命高曰君之幸高也將使高攻管也夫以父攻子守人大笑也見臣而下是背主也父黷子背亦非君之所喜也敢再拜辭使者以報信陵君大怒復遣使之安陵且脅之以兵安陵君不從高曰信陵爲人悍而自用此辭返必爲國禍吾已全已無違人臣之義豈可使吾君有魏患也乃之使者之舍刎頸而死

袁恕己 唐

袁恕己滄州東光人仕累司刑少卿知相王府司馬與誅二張又從相王統南衙兵備非常以功加銀青光祿大夫中書侍郎同中書門下三品封南陽郡公實封五百戶將作少監楊務廉者以工巧進恕己恐其復啟遊娛侈麗之漸言於中宗曰務廉位九卿忠言嘉謨不聞而專事營構以媚上不斥之無以昭德乃授陵州刺史未幾拜中書令特進南陽郡王罷政事例及貶又流環州爲周利貞所逼恕己素餌黃金至是飲野葛數升不死乃擊殺之謚貞烈恕己與張柬之等提衛兵誅佞臣中興唐室有社稷功

袁高

袁高字公願恕己之孫少慷慨有節尚擢進士第代宗時累遷給事中京畿觀察使坐累貶韶州長史後復拜給事中德宗將起盧杞爲饒州刺史高當草詔見宰相盧翰劉從一曰杞當國矯誣陰賊使宗祐失守朝廷不寘以法纔示貶出今還授大

州天下其謂何翰等不悅命舍人作詔詔出高執  
不下奏曰陛下用杞爲相出入三年附下罔上使  
陛下越在草莽群臣願食其肉罪當萬死陛下赦  
不誅止貶新州俄又令內移今復拜刺史誠失天  
下望帝翌日遣使慰高曰朕惟卿言切至已如奏  
貞元二年帝以大盜後關輔百姓貧田多荒蕪詔  
諸道上耕牛委京兆府勸課量地給牛不滿五十  
畝不給高以爲聖心所憂乃在窮乏今田不及五  
十畝卽是窮人請兩戶共給一牛從之卒年六十

中外悵惜憲宗時李吉甫言其忠謇特贈禮部尚  
書文宗開成三年又詔恕己曾孫德文爲校書郎  
始帝訪御史中丞狄兼謨以仁傑功且言五王遺  
烈乃求其後秩以官

劉摯 宋

劉摯字莘老永靜軍東光人十歲而孤鞠於外氏  
就東平因家焉嘉祐中擢甲科歷冀州南宮令其  
邑賦甚重輸絹疋折稅錢五百綿兩折錢三十民  
多破產摯援例旁郡條請裁以中價轉運使怒將

劾之摯固請日獨一州六邑被此苦決非法意但朝廷不知耳遂告於朝三司使包拯奏從其議是時與信都令李冲清河令黃萃皆以治行聞人稱爲河朔三令陟江陵觀察推官用韓琦薦得館閣校勘王安石一見器異之擢檢正中書禮房月餘爲監察御史裏行未及陞對卽奏論亳州獄又言程昉開漳河調發猝迫人不堪命趙子幾擅升畿縣等張靚王廷老擅增兩浙役錢督賦嚴急人情嗟怨此皆欲以羨餘希賞願行顯罰明朝廷本無

聚歛之意及入見神宗面賜褒諭因問卿從學王安石耶安石極稱卿器識對曰臣東北人少孤獨學不識安石也退而上疏曰君子小人之分在義利而已畏義者以進取爲可耻耆利者以守道爲無能此風浸成漢唐黨禍必起矣惟君子爲能通天下之志臣願陛下虛心平聽審察好惡稍抑虛譁輕僞志近忘遠幸於苟合之人漸察忠厚慎重難進易退可與有爲之士收過與不及之俗使會於大中之道則設施變化惟陛下號令之而已又

論率錢助役自顧人有十害語在本傳會御史中丞楊繪亦言其非安石使張琥作十難以詰之琥辭不爲司農曾布請爲之旣作十難且劾摯繪欺誕懷向背詔問狀繪懼謝罪摯奮曰爲人臣豈可壓於權勢使天子不知利害之實卽條對所難以伸其說且曰所謂向背臣所向者義所背者利所向者君父所背者權臣願以臣章並司農奏宣示百姓考定當否如臣言有取幸早施行若稍涉欺罔甘就竄逐不報明日復上疏曰陛下起居言動

躬蹈德禮夙夜勵精以親庶政天下未至於安且治者蓋自青苗之議起而天下始有聚歛之疑青苗之議未久而均輸之法行均輸之法方擾而邊鄙之謀動邊鄙之禍未艾而助役之事興至於求水利行淤田併州縣興事起新難以徧舉輕用名器淆混賢否忠厚老成者擯之爲無能狹小儂辯者取之爲可用凡政府謀議經畫除用進退獨與一掾屬決之然後落筆同列預聞反在其後故奔走乞憐之人其門如市今西夏之歛未入反側之

兵未安三邊瘡痍流潰未定河北大旱諸路大水民勞財乏縣官減耗聖上憂勤念治之時而政事如此皆大臣誤陛下而大臣所用者誤大臣也疏奏安石欲竄之嶺外神宗不聽但謫監衡州鹽倉繪出知鄭州琥亦落職元豐初入爲集賢校理知大宗政寺丞爲開封府推官神宗開天章閣議新官制除禮部郎中哲宗卽位宣仁后同聽政召爲吏部郎中改秘書少監擢侍御史上疏勸講進讀以廣睿知哲宗然之時蔡確章惇在政府而確爲

山陵使神宗靈駕發引前夕不入宿摯劾之無何確上表自陳嘗請收援當世之耆艾以佐輔王室蠲省有司之煩碎以慰安民心摯謂使確誠有是請不言於先朝爲不忠之罪言於今日爲取容之計誠無是請則欺君莫大於此又疏確過惡大畧有十論章惇凶悍輕佻無大臣體皆罷去又請雜用經義詩賦取士復賢良方正科罷常平免役引朱光庭王巖叟爲言官執憲數月正色彈劾多有貶黜百僚敬憚時人以比包拯元祐元年擢御史

中丞摯上疏論政請立監司考績之制歷拜尚書右僕射摯性峭直有氣節通達明銳觸機輒發不爲利怵威誘自初輔政至爲相修嚴憲法辨白邪正崙以人物處心孤立大義不受謁請子弟親戚入官皆令赴銓部以格調選未嘗以干朝廷與呂大防同位國家大事多決于大防惟進退士大夫實執其柄然持心少恕勇于去惡竟爲朋讒奇中紹聖四年貶鼎州團練使新州安置惟一子從焉居數月以疾卒年六十八徽宗立詔反其家屬用

東光縣志

卷之七

七

子跂請得歸葬復觀文殿大學士大中大夫紹興初贈少師謚曰忠肅

劉甲

劉甲字文師其先永靜軍東光人元祐宰相摯之後也父著爲成都漕幕葬龍游因家焉甲淳熙二年進士累官至度支郎中遷樞秘院檢討兼國史院編修官實錄院檢討官使金至燕山伴宴完顏者名犯仁廟嫌諱甲力辭完顏更名修九月三日金宴甲以宣仁聖烈后忌辭還除司農少卿進太

常擢權工部侍郎陞同修撰除寶謨閣待制知江陵府湖北安撫使移知瀘州程松爲四川宣撫使吳曦副之以甲知興元府利東安撫使時蜀口出師敗岷金陷西和成州曦焚河地縣先是曦已遣姚淮源獻四州於金金鑄印立曦爲蜀王甲時在漢嘉未至鎮也金人破大散關興元都統制母思以重兵守關而曦陰撤驀關之戍金自拔盆谷繞出關後思孤軍不能支遂陷松謀遁甲固留不可遽以便宜檄甲兼沿邊制置曦遣王鉞趙觀以書

致甲甲援大義拒之因卧病曦又遣其弟旼邀甲相見甲叱而去之乃援顏真卿河北故事欲自援歸朝先募二兵持帛書遺參知政事李璧告變曦僭王位甲遂去官朝廷久乃微聞曦反狀韓侂胄猶不之信甲奏至舉朝震駭璧袖帛書進上覽之稱忠臣者再以帛書賜甲曰所乞致仕實難久從召赴行在二兵皆補官甲舟行至重慶聞安丙等誅曦復還漢中上奏待罪詔趣還任甲奏叛臣子孫族屬及附僞罪狀公論快之會安丙以楊巨源



自負倡義之功陰欲除之語在巨源傳巨源既死軍情叵測除甲宣撫使未幾金自鵲嶺關進屯八里山甲分兵進守諸關截潼川戍兵駐饒風嶺以待之金人知有備引去侂胄誅上念甲精忠拜寶謨閣學士賜衣帶鞍馬朝廷聞彭輅與丙不協以書問甲又俾論丙汰諸軍勿過甚明年罷宣撫司合利東西爲一帥治興元移甲知潼川府安丙旣同知樞密院事董居誼爲制置使甲進寶謨閣學士知興元府利路安撫使節制本路屯駐軍馬朝

廷計居誼猶在道命甲權四川制置司事先是大臣撫蜀者諸將事之有所謂互送禮實賄賂也甲至下令首罷之凡丙所立茶鹽柴邸悉廢之丙增多田稅甲命屬吏討論由一府言之歲減凡百六十萬緡米麥萬七千石邊民感泣嘉定七年卒於官年七十三甲幼孤多難母病刲股以進生平嘗謂吾無他長惟足履實地晝所爲夜必書之名曰自監爲文平澹有奏議十卷理宗詔謚清惠

孝行

古人論孝不一常變異宜總之心乎親而已割股廬墓宋人謂爲過情不知中庸不可能與其不及情毋寧過情況夫閨閣淑媛處常達變有鬚眉男子之所不及者豈可持論過刻以傷孝子之心哉故於歷代以來詳載六人而負姑避寇之婦人亦續編之以爲後世勸

劉伯容元

劉伯容號石田宋丞相摯之裔性純孝嘗有術者推其父壽不永輒嗚咽酸辛每旦雞鳴而起率弟仲禮望北斗跪祝曰願減容兄弟壽各十年以益吾父祝畢叩顙而拜如是者三十餘年後父果七十有六而終人皆以爲孝感所致云

回滿住明

回滿住永樂時人奉祖母劉至孝劉病割股進之愈詔旌其門

孫永昌

孫永昌父殂甘肅徒步尋找負骨而還州縣俱旌

其門云孝子孫永昌萬里還親

孫守禮

孫守禮順城鄉民母亡廬墓三年人稱其孝

息隆泰

息隆泰邑庠生文安訓導養情子明末隨父任值  
變身被數鎗猶勉負父逃匿深林中鎗發流血數  
升而死妻王氏年僅二十遺孤甫四歲氏堅志守  
節四十年如一日一門節孝兩全孫如洵中順天  
庚午鄉試人以爲節孝之德所致云

東光縣志

卷之七

十一

皇清

劉纘宗

劉纘宗邑庠生甘肅兵備道佳禎子也因父死甘  
肅難棄室家往收父骸至秦中爲流寇所獲迫之  
從纘宗備道其由賊義之送之出境及抵甘肅哀  
毀成疾廬墓側絕飲食而死秦明經蔣名禮憐之  
捐貲治葬立石以紀

王氏

王氏邑處士孫如乾妻生員孫文顯孫文耀母也

順治五年土寇陷城氏負姑逃避獲免於難至十三年翁以病逝氏伴事姑嫜晝夜不離左右者十有三年又典餼數十金爲夫置妾復生一子祝同已出邑紳士公舉其孝且群稱其慈而不訾焉享年七十歲以無疾而終

曲氏

曲氏邑處士侯錫命妻中年夫歿子尚幼翁姑年踰古稀氏躬親紡績勤奉<sub>下</sub>旨以羨延師訓諸孤勉以顯揚子安方寧方孫勲<sub>共</sub>名列鬢序光前裕

東光縣志

卷之七

十一

後悉氏之力也代篆馬公扁以旌之曰壺儀足式洵非溢美云

李氏

李氏太學生侯永清妻夫歿子幼親老氏孝事翁姑晨昏罔間訓子讀書寒暑不輟長子邲身列鬢宮次子邢名登國雍悉氏之力也邑侯鄭公以扁旌其門曰節孝可風云

勲業

古爲今鑑猶今爲後鑑也古來執大義成大功名重當時聲施後世者其英風大節類皆百世型範匪特一時才也東邑雖僻處一隅自明至今三百餘年賢哲挺生勲猷接踵特因前志未闡不獲與漢唐以來諸君子並垂天壤亦缺典也茲故表而著之以備鑒觀獨是僖靖公位極人臣賜謚諭葬祇以數傳不嗣文獻無徵故一傳廖寥綴遺補闕深有望於後之君子

東光縣志

卷之七

十二

馮唐

漢

馮唐祖父趙人也父徙代漢興徙安陵唐以孝著爲中郎署長事文帝帝輦過問唐曰父家安在對曰臣大父趙人上曰昔有爲我言趙將李齊之賢戰於鉅鹿下今吾每飯意未嘗不在鉅鹿也唐曰尚不如廉頗李牧之爲將也上拊髀曰嗟夫吾獨不得廉頗李牧爲將耳豈憂敵哉唐曰陛下雖得廉頗李牧不能用也上怒讓唐唐曰上古王者之遣將也跪而推轂日闔以內寡人制之闔以外將

軍制之軍功爵賞皆決於外李牧是以得盡其智能而趙幾伯今魏尚爲雲中守敵人遠避不敢近塞敵會一入尚率車騎擊之所殺甚衆坐上功首差六級文吏以法繩之削其爵由此言之陛下雖得頗牧弗能用也上說是日令唐持節赦魏尚以爲雲中守而拜唐爲車騎都尉

### 竇嬰

竇嬰字王孫孝文皇后從兄子也世爲觀津人孝文時爲吳相以病免孝景卽位爲詹事帝弟梁孝

王母竇太后愛之孝王朝因燕昆弟飲酒酣上從容曰千秋萬歲後傳王嬰引卮酒進上曰天下者高祖之天下父子相傳漢之約也上何得傳梁王太后由此憎嬰因病免孝景三年吳楚反時宗室諸竇無如嬰賢召入見固讓謝稱病不足任上曰天下方有急王孫寧可以讓耶廼拜嬰爲大將軍賜金千斤嬰言袁盎欒布諸名將賢士在家者進之賜金陳廊廡下軍吏過輒令自取爲用金無入家者嬰守滎陽監齊趙兵七國破封爲魏其侯每

朝議大事列侯莫敢與抗禮四年立栗太子以嬰爲傅七年太子廢嬰爭弗能得謝病歸梁人高遂說嬰曰能富貴將軍者上也能親將軍者太后也今將軍傅太子太子廢爭不能援又不能死自引謝病擁趙女屏間處而不朝祇加懟自明揚主之過有如兩宮真將軍則妻子無遺類矣嬰然之廼赴朝請如故條侯免相竇太后數言魏其景帝曰魏其沾沾自喜耳多議難以爲相遂不用

耿純

耿純字伯山鉅鹿人世祖時拜純爲前將軍封高陽侯建武二年自請曰臣幸備位列將爵爲通侯天下畧定臣無所用志願試一郡盡力自效帝笑曰卿旣治武復欲脩文耶廼拜純爲東郡太守時東郡未平純視事數月盜賊清寧居四歲坐累免以列侯奉朝請從擊董憲道過東郡百姓老少數千隨車駕涕泣云願得耿君帝謂公卿曰純年少披甲胄爲軍吏耳治郡乃能見思若是乎六年定封爲東光侯純辭就國至鄴移穀萬斛到國弔死

問病民愛敬之後復爲東郡太守卒於官謚曰成

孟 觀晉

孟觀字叔時渤海東光人也少好讀書解大義惠  
帝卽位稍遷殿中中郎賈后欲誅楊駿使人諷觀  
會楚王瑋將兵討駿及駿誅以觀爲黃門侍郎遷  
積弩將軍封上谷郡公氏羌反於關中衆數十萬  
諸將覆敗相繼以觀沉毅有文武材用乃命觀討  
之觀所領宿衛兵皆趨捷勇悍並統關中士卒身  
當矢石大戰數十皆破之生擒五百威懼氏羌徵  
拜右將軍趙王倫以觀所在著績署爲安南將軍  
監河北諸軍事假節屯宛觀子平爲淮南王久前  
鋒將軍討倫戰死

韓 恒

韓恒字景山觀津人也父默以學行顯名恒少能  
屬文師事同郡張載載奇之曰王佐才也永嘉之  
亂避地遼東慕容廆旣逐崔毖召見拜參軍事咸  
和中宋該等建議表請大將軍燕王之號廆納之  
命群僚博議咸以爲宜恒駁白自群雄乘亂人嬰



荼毒諸夏蕭條無復綱紀明公忠武篤誠憂勤社稷抗節孤危之中建功萬里之外終古勤王之義未之有也夫立功者患信義不著不患名位不高故桓文有一匡之功亦不先求禮命以令諸侯宜繕甲兵候機會除群克靖四海功成之後九錫自至且安居以求寵爵非爲臣之義也庖不平之出爲新昌令覬爲鎮軍復參軍事遷營丘太守政化大行雋爲大將軍徵拜咨議參軍加揚烈將軍雋僭位將定五行群臣議以燕宜承晉爲水德雋召

恒以決之恒曰趙有中原非惟人事天所命也天實興之而人奪之臣竊謂不可且大燕王迹始自於震於易震爲青龍受命之初有龍見於都邑龍爲水德幽冀之符也雋後終從恒議雋秘書監清河聶能聞恒言乃嘆曰不有君子國何以興其韓令君之謂乎後與李產俱傅東宮從太子入朝雋顧左右曰此二傅一代偉人未易繼也其見重如此

高久字伯恭漢太傅褒之後也少有奇度崔宏見而異之曰高子黃中內潤文明外照必爲一代偉器旣長傅通經史天文術數太武時入授景獻太子經又與崔浩同修國史後浩以史事被收景獻謂久曰入見至尊吾自尊卿脫禍至尊有問但依吾語景獻見帝言久小心慎密且微賤制由崔浩請赦其罪帝召久問曰國史皆浩所爲乎對曰臣與浩共爲之然浩所領事多總裁至於著述臣多於浩帝怒曰久罪甚於浩何以得生景帝懼曰天

威嚴重久小臣迷亂失次耳帝問久信如東宮所言乎對曰臣罪當族滅不敢虛妄殿下以臣侍講日久欲丐其生耳帝顧太子曰直哉此人情所難而久能爲之臨死不易辭信也爲臣不欺君貞也宜特除其罪後拜中書令仍領史事在位多所裨益凡弛田禁革北俗興學校省工役皆自久發之孝文初進封咸陽公卒年九十八贈侍中司空謚日文

張謙祖冲素長沙府通判父從恕鎮西寧總管洪武初謙以茂才舉授陝西兩當典史綽有政聲

### 廖 紀

廖紀字廷陳弘治庚戌進士釋褐授吏部主事擢郎中出爲外臺司憲內陞太僕晉奉常旋貳司空再轉留都大司馬晉天卿復轉北京秉鑑持衡人稱簡要清通焉嘗會友人纂輯邑志使文獻不至湮沒者公之力也既卒賜謚僖靖遣官治葬焉

### 馬汝松

東光縣志

卷之七

十九

馬汝松字節甫世業農桑至封徵仕公始通儒術薄宦有水蘖聲公生而負性簡重博洽多聞成嘉靖甲辰進士起家中書舍人遇覃恩封公父如其官秩滿奏績擢工科給事中正色立朝丰裁凜然歷數載晉都本科與椒山公同鄉薦夙稱莫逆議論多符爲名諫官七年竟以直言忤權罷終不復仕日娛詩文課諸子學無一語撓守牧權亦無尺一走長安道中輿論高之所居故白扉至不容車河間士大夫號爲清門先生

莊蒞民

莊蒞民字善甫號禮齊年十七補博士弟子第一  
旋奉父命赴都從翰林席先生虛山學卓有譽望  
嘉靖辛卯以麟經魁畿內丁未舉進士筮仕山陽  
縣大計治化居天下第二以考績授文林郎先時  
有當道子過山邑索夫役竟弗應及行取將處以  
科道當道者語執事曰莊山陽乃至此耶銓部阿  
其意授刑曹焉恤刑絳都議賑淮上衡財折獄各  
有成績遂以刑曹出守陝西西安府以考績特進

東光縣志

卷之七

二十一

階中順大夫是年陞本省按察司分巡河西道副  
使駐鄜州經畫陝以西之北邊關輔士大夫學官  
弟子暨正學書院諸弟子咸贈以言有山斗瞻依  
甘棠遺愛棠廕頌聲諸圖詩以誌不忘以覃恩特  
授階中憲大夫嗣調雲南叅政德教治化無異於  
陝遷山西行太僕寺卿以嘉議大夫進階一級致  
仕著訓言十則以傳壽九十終

王嘉言

王嘉言字孔彰號慎齋生而穎慧年十六補博士

弟子嘉靖戊午舉於鄉乙丑捷南宮選庶常讀書中秘丁卯改授浙江道監察御史公入西臺以風紀言責爲己任會華亭與新鄭忤因上言傷直遂與新鄭有郤會乾清坤寧工成詔爲尚寶司卿無何新鄭復相出公知楊之通州後遷同知夔州府又嘗視篆瀘州二年陞南京戶部湖廣司郎中未任改禮部儀制司因忤尚書潘新昌出知山東濮州上聿陳情詔許終養而公功名之心灰矣直指屢薦不起優游林泉二十餘年年七十終於家所

東光縣志

卷之七

二十一

著有太史集行於世

馬久登

馬久登字叔先都諫公季子也初都諫公以冊藩使過家夜夢日有光射腹詰旦舉公十歲能屬文十三推擇邑諸生弱冠知名爲高等時都諫公家居久意落如也垂老親交踈門戶就衰日夜望公繼其家公年二十有一而都諫公卒卒三年而公成進士公修恪類父而警慧意豁然喜任義爲氣而外矜節凜凜也初令齊河齊民故匿知而囂見

公年少心狎易之邑故獄有賣漿老夫婦以積貲爲人殺之荒野官求盜不得而坐其主與同居者公至廉得真殺人者市中時來沾兩惡少也訊決立服易獄而反其主與同居者邑驚爲神半載齊河大治調濰未行以內艱去官起補泌陽再移安陽時民間苦養馬公請折徵銀部使者以聞卒著爲令漳河溢流漂民居死者千百人公單車馳至發民悉收流屍聚於區斂埋之日溺塚發倉廩分賑無居者召還里先給而後報民忘其災公前後

爲令五年薦剡數十上徵拜御史福建道嘗一巡蘆溝尋按遼劾去將吏穢不法者又按淮揚四郡兼董學政時淮泗大水湖波泛漲公會中丞合疏治月河築塘捍湖於外隄延五十里舟卧而過也河成朝廷賜白金復詔紀之已還留主臺務掌河南道丙戌丁亥內外計公皆與聞大寮貴戚有絀公論者往往露章彈擊雖觸忤賈怨不爲嫌也長安中凡去一宗伯一中丞又請限戚里恩澤無厭禁功臣世家作威京師肅然自宰輔與公卿多稱

馬御史壯其風節焉會與同事議持不能平語相  
侵至面執爭詬御史大夫前於是兩出之公出副  
使山東備青州兵公領臺章久衆意公必厭薄外  
吏不爲而公顧曰吾柱後惠文自若也提衡三郡  
守三十州縣之長與之覈軍實備要害海岱之間  
間左晏然在青一年以能遷楚叅藩督賦事當歲  
荒建議請蠲折半百姓爭輸凡三部運渡淮行至  
江都病至邳病甚漕使者賈公勸趣至家公以洪  
舟未盡惟謝而已日自力疾督牽輓應賓客不休  
一夕危坐卒時年四十有四漕使者上其勞請加  
卹旨下格不行中朝公卿知者與四方交遊之士  
皆爲泣歎云

吳堯年

吳堯年號唐衢明神宗加太子太保錦衣衛大堂  
後軍督都府左督都端顏立朝政聲赫著

皇清

馬廷贊

馬廷贊字君襄號大還性至孝事父貢士馬紹箕

親舐瘡癰籲天代死精於理學以教育人材爲已  
任戊子舉於鄉己丑成進士任湖廣宜都縣維時  
楚地初開居民寥寥公捐俸金給牛種躬勸農桑  
闢地五百餘頃宜都地逼賊氛公練鄉勇諭大義  
勦撫並施賊不敢渡江北下他如瘞骸骨築城垣  
課士子皆載在宜邑乘治宜僅二載旋以勞瘁成  
疾卒於官年五十三歲邑人如喪考妣同僚檢筭  
中公服外圖書數帙而已鳴之上臺捐金助喪殆  
克抵里舍所著有禹貢畧等書行於世崇祀鄉賢

馬之騁

馬之騁字元敏少穎悟讀書過目不忘成童補邑  
庠弟子員邃於理學文名噪於一時戊子舉於鄉  
己丑成進士釋褐授行人奉使粵西尋使楚咸趣  
駕早還不淹遲累守土者旋擢夏官督捕郎立剖  
決無久羈焉囚寒苦無衣捐捧市皮衣七十餘衣  
之活人甚衆任督捕周年值秦閩三楚督學缺出  
天子命取清勤素著學行兼優者親試殿前試題  
書藝一首表一通排律一章屬文傾刻立就命



下特勅督學陝右入關後科試諸生甄拔悉知名  
士歲試未竣遂積勞成疾疏請於

朝于告歸出關之日秦人士依戀不忍去力疾就道  
病益甚卒於靈寶年五十有五卽謂之以人事君  
以死勤事無槐焉崇祀鄉賢

文學

昔孔子講業齊魯門下以文學稱者惟游夏獨擅一時非其人莫與茲焉東邑衛河環帶夙稱瀛海文獻之區其間地靈所鍾含毫挺曜足稱學海而前志闕如殊爲削色故分而載之亦見有聖門之一科云

苗神客

唐

苗神客渤海東光人初爲周王府戶曹參軍後與元萬頃等與世爲著作郎撰列女傳臣軌百僚新

東光縣志

卷之七

一十六

誠樂書等九千餘篇至朝廷擬議表疏皆密使叅處以分宰相權故時謂之北門學士供奉左右二十餘年終著作郎

張

預

宋

張預字公立東光人精諳孫吳韜畧而不自用於時所著有百將傳行於世其進百將傳表詳表志

祀鄉賢

霍德行

明

霍德行字道本號文所幼敏悟過人甫五歲大父

口授四子書通鑑事段輒成頌稍長從劉仲河先生遊敦本篤行卽以大儒自期應童子試經書及後場諸題援筆立就爲邑侯左公物色又爲學使者擊節曰何物奇才博古乃爾聲震瀛州屢試冠軍緣數奇不偶遂舉明經初除中州涉邑訓再陞瀋陽教授學臺丞口獎賞名動三韓未期年請告歸里督撫贈之金而重以詞曰振鐸風清掛冠節重撫齋中之獨鶴見林下之一人解組後潛居閭里克自好修善聲律古文詞著有碩寬堂詩文集

東光縣志

卷之七

二十七

淵源錄游涉錄循環說家訓等書行於世

郭興治

郭興治號熙明少穎異絕群讀書輒解大畧弱冠補邑庠諸生旋領鄉薦年三十成萬曆庚戌進士釋褐除行人司行人奉命冊德府世子旋復奉命使江西淮府踰年復命值本生母故陳情守制不候命歸田釋服再補本官復命差楚府旋陞工科給事中歷二載外陞河南叅藩是年冬賜環仍補本科具疏力辭不得旨旋陞戶科右又陞吏科左

又晉兵科都陞太僕寺少卿以延鎮序功加正卿  
三疏請告准假調理以違限太久欲赴都伸請遂  
實授正卿焉是秋三殿工成群臣俱行加陞以工  
科故加銜都察院右副都御史贈祖父父本生父  
如其官次年告病回籍家居十餘年卒公清正自  
持不識權璫後竟以魏黨註誤識者冤之著有夢  
乘榮木庵遺稿等書存於家其陳情疏詳見疏志  
至今讀之令人墮淚卽謂之孝子亦可

皇清

東光縣志

卷之七

一二十八

馬廷宣

馬廷宣字元升少負奇姿一目十行年十二補弟  
子員辛卯以選援入國雍試輒冠軍人方嘖嘖驚  
羨公反自厭其掄元之數也大司成評公文云玉  
立淵澄洵爲確論公爲人端亮博覽群書性至孝  
事繼母如所生友愛兄弟敦睦宗族洽比黨里周  
急恤困無意仕進以著作自娛丁卯捐館舍年七  
十有二所著有讀史纂要諸書祀鄉賢

馬廷翰

馬廷翰字德鴻廷宣胞弟順治乙酉科舉於鄉性  
穎慧嗜學廣積典籍日事研稽好賓客善吟咏署  
安州學正勤於訓課士風丕振內陞雍秩三舍生  
胥欽師範引疾歸怡情詩書與未仕時無異杜門  
養高遠近仰重所著有詩集古文詞年六十有五

馬孔懷

馬孔懷字士雅己酉舉於鄉癸丑成進士不樂干  
謁亦無意仕進家居十餘年著述甚富書法精工  
詩詞蒼古其尤著者樂志軒集年六十有四

隱逸

昔司馬遷作史詳傳伯夷蓋以清風奮然於百世之上而百世之下聞其風者猶感慕興起也邑士固多顯榮然甘恬退樂考槃含硯不耀卓然高蹈可與逸民之稱者亦伯夷之徒也昔人謂通顯難得予曰隱逸爲尤難然通顯由於命隱則自人爲之許由務光當時天子以天下讓皆不屑豈由命耶彼溺焉不知止者其鏡之哉

韓默

晉

東光縣志

卷之七

三十

韓默字景山恒之父觀津人以學行知名隱居不仕

劉居正

宋

劉居正摯之父摯兒時居正課以書朝夕不少倦或謂居正一子獨不可少寬耶居正曰正以一子不可縱也卒成名賢

劉世賢

元

劉世賢字希孟宋丞相忠肅公九世孫中書震孫之曾孫也忠肅公善琴子孫世其學其後徙湖州

至世賢遂以琴名浙右為人端重持論正大虞文靖公當贈以文遊松江與曹知白善至正癸巳卒歸葬湖州子伯容仲禮孫誠

劉仲禮

劉仲禮號石林天資高古剛毅好學善琴名公大夫為寫石林圖以贈襄王聞其名聘之為師嘗為寫像製贊日丰骨稜層神氣超越幽壑清水長空秋月其寵遇如此明文皇初重加徵聘未至而卒

劉誠

東光縣志

卷之七

三十一

劉誠字克誠號雲溪性純雅讀書好禮以琴侍王命之對坐後辭歸王作春江送別圖詩贈之永樂初少保姚公祭酒胡公薦於朝徵至闕下屢詔入便殿賜坐鼓琴命官不受隱居林下以布衣終身

劉鴻

劉鴻字公序號琴樂聰敏寬裕博學善琴文皇徵至朝命鼓琴於庭寵渥洽至予官不受歸隱雲間

鄒野漁

鄒野漁弘治時人嘗從征劉烈有破妖功命官不受予金不受惟徜徉肆志與邑冢宰廖僖靖公相善一日居公家同諸新貴題壁間漁樵圖詩云士林朽木歸樵斧宦海貪魚上釣竿須信堯夫原有意時人勿作畫圖看諸進士改容受之後年老依僖靖公公卒竟餓死鄉賢祠中



義行

匹夫仗義居然大俠蓋豪舉秉於天性不以人之顯晦殊觀故輕利重義周急濟危此風固未嘗渺也而嗜利之徒亦往往有之東邑雖微尚有義風是以不厭詳載以為鼓勵斯世之勸

牽招魏

牽招字子從觀津人也年十餘歲詣同縣樂隱受學後隱為車騎將軍何苗長史招隨卒業值京師亂苗隱見害招與隱門人史路等觸蹈鋒刀共殞

東光縣志

卷之七

三十三

殮隱逸喪還鄉道遇寇路等皆散走賊欲砍棺招垂涕請赦賊義之釋去由此顯名袁紹辟為督軍從事

郭友諒明

郭友諒正統六年以歲荒出粟千餘石賑濟饑民有司以聞賜勅旌嘉又與子允等修儒學正殿兩廡捐貲修縣治邑中藉以修舉者甚多其他義施不能盡錄有子七人名濤者以明經任膚施知縣允曾孫與治中庚戌進士人以為尚義之報云

馬經

馬經湖廣宜章令公解組歸里置義田一頃二十畝本門輪流耕種收管春秋祭祀公用外餘者闔族有貧不能婚葬者給之

廖瑄

廖瑄字景輝淡庵其別號也本廣東瓊臺人年十六補邑庠弟子員宣德中坐父北徙途經東光因家焉公倜儻崇義博綜經史善爲行書東光之人多修贄受學公亦以師道自任持範甚嚴里有是非不決者皆就質公而折之無少假借然心極惠慈喜賑貧乏景泰間東光饑疫大作殍夫枕野公率家人爲掩其骼隣有不能葬者爲市棺具稱貨不能償者潛焚其券家人有以市量鬻粟者公亟命毀之曰人饑若此爾乃乘時罔利耶聞者稱服嘗有男子夜醉僵臥雪中公命舁於家家人曰不知其人氏且不測恐以禍公曰吾知活人耳他非所計也其人竟得不死童僕有竊粟者家人欲窮治之公曰彼亦爲衣食計耳且其所得幾何卒不

究公之仁愛類如此

鄭 杲

鄭杲力行仁讓五世同居家口百餘置田二萬畝  
縣扁旌其門嘉靖初年有賊二十餘人先聲欲劫  
其家杲姪鄭堂城居聞知赴家路逢親者阻日子  
何飛蛾投火堂厲聲叱之至家簡練防守泣日吾  
家眾口寧死在一處耳豈肯聽旁人之言不赴救  
耶後賊至杲不爲災至今享杲之產業者未始不  
高堂之義氣

東光縣志

卷之七

三十五

馬紹芳

馬紹芳侍御公仲子也初公家居時念族眾且貧  
有不任祭者日吾先大夫捐附郭田二百畝以所  
入措辦今支派既煩恐有不給於是復捐田二百  
畝務使祭祀豐潔又建親睦堂三楹每有事於先  
塋必聚族人而觴之盡醉極歡或有行事乖理者  
即於是日勸戒規正業師張貸金二百不責償值  
歲歉穀貴公輸粟四百石邑令王公旌其廬日義  
門

李八公

李八公洪武間寓居東光其後嗣漸盛闔族捐貲蓋祠堂一所春秋祭祀置田六十畝餘以給貧不能婚葬及讀書之無供給者至今未之或改

王愛槐

王愛槐崇禎己卯年助兵餉九千兩士民不至流離迄今闔邑均感

王友諒

王友諒暨子克敬等來寓東光縣黑龍廟王家庄

東光縣志

卷之七

三十六

其後子孫蕃庶建睦族敦倫祠堂一所雖支屬絕嗣無不與焉每逢朔望率眾詣祠講 聖諭置義田二百餘畝以薦祖考兼助喪婚之不給者設立義學以訓子孫至今十三代未之或改

貞烈

尚志立節丈夫所難而况閨閣女流乎乃一遇事變或之死靡他而其守不失或拮据撫遺而能世其業初無古今先後丈夫女子之異也而修史者於前朝節婦外僅書我

朝四氏豈近日諸節未之前聞耶抑以婦人守節身後諭定故有待於後人也嗚乎閨門之內風化之本茲故表而出之以為世勸

明

東光縣志

卷之七

三十七

李氏

李氏鄧廉妻嫁未周而廉卒李年十八守志設靈每旦三上食臨哭布衣蔬食矢志堅守忽夜夢一男子容止甚都欲求為偶李氏睡中不許後恒夢書符禁呪莫能絕李氏嘆曰吾誓不移節而為精魅所撓蓋吾容貌未衰故也遂截髮垢面麻衣不濯其鬼來謝曰夫人竹栢之操不可奪也自是不復夢郡守旌其門至今有節婦里

苑氏

苑氏生員侯朝彥妻年二十夫病狂欲殺之恐死改嫁耳苑以死自誓剪髮塗而終身績紡雖至親罕見其面壽七十五歲卒

姜氏

姜氏生員陸烜妻烜病故氏年二十有三誓欲從烜地下時有數月之孕勸之者曰汝夫骨血惟此一點汝縱一死自甘其如絕嗣何氏勉強從焉後生遺腹子得為諸生孀居四十餘年有司及儒學有扁旌其門

東光縣志

卷之七

三十八

竺氏

竺氏鄉民吉木妻氏十九夫歿腹有數月之孕家無寸土恪事舅姑苦守婦節黨無詬言厥後子孫重累家業頗與壽八十餘得蒙旌表

李氏

李氏鄉民陳居妻年十八夫故立誓守節上孝翁姑下訓孤兒制行猶水人咸稱之

柴氏

柴氏經歷張鍼妻夫故奉侍翁故親嘗湯藥撫養

繼子早入鬻宮婚葬捐貲讓翁遺產奉旨旌表其門

袁氏

袁氏鄉民于三畏妻夫故氏年二十一歲姑病子孤氏艱苦守志奉姑育子歷四十餘年節操如一日有扁旌表

金氏

金氏承差于三省妻省故氏年二十三歲與三畏妻撫孤守節相誓同志迄今合袁氏稱一門雙節

東光縣志

卷之七

三十九

趙氏

趙氏馬頭鎮趙姓婦也夫故無子翁老族人咸魚肉之婦買一女進之翁房翁不肯納氏跪日翁老兒婦不便近前願畱此女早晚奉侍稱便翁勉強納之久而有孕生一子氏撫育教訓老翁無子而有子亡夫無弟而有弟皆此婦之賜云

韓氏

韓氏鄉民吳邦儒妻年二十夫故矢志守節荼苦終身年八十四歲鄉黨交揚內外無間

崔氏

崔氏生員閻有俊妻俊故氏二十四歲孝事孀姑嚴訓二子躬親繡紉課子讀書五十餘年不改有司儒學俱以扁旌之

杜氏

杜氏鄉民趙時顯妻年二十夫歿翁姑憐其年幼命之改適氏不從矢志撫孤節凜水霜毫無玷缺

劉氏

劉氏鄉民孟思德妻年二十三夫卒苦志守節績

東光縣志

卷之七

四十

紡度日撫侄如子得爲諸生魯蒙旌表

皇清

王氏

玉氏邑太學生元俊女交河進士孟公章明妻也明甲申闖寇陷京師孟父少司寇死忠孟公曰吾不忍大人獨死當死從之氏曰君死妾亦死遂自

縊

皇清定鼎賜謚孺人立祠祀焉

陳氏



陳氏李文秀妻順治戊子土寇竊發被賊執欲污之氏罵不絕口賊怒鞭其背扶之上馬不從以頭觸地如此者數四罵聲愈厲賊刃而死

施氏

施氏處士馬中驪妻姑劉遺子甫四歲氏撫之若子前妻侯遺子方二歲氏撫之與已出無異氏連舉五子夫亡子幼氏啖糠齋教讀書卒皆成名苦節三十餘年壽六十九終人稱為女中丈夫焉

夏氏

夏氏處士張于宁妻宁亡氏年十七遺子僅週歲艱辛從一迄今三十餘年

孟氏

孟氏生員莊會臯妻夫亡氏年十九子方襁褓父欲奪其志氏以死自誓茹蘖飲水歷五十一載卒事姑唐氏克盡婦道撫孤遊庠里黨稱令母焉合魏氏闔邑紳士公舉雙節並垂汗青云

魏氏

魏氏生員莊會憲妻夫亡氏年二十八事姑唐氏

以媳代子教子遊庠食廩又以母代父孀苦四十餘年而終完名全節邑侯金給扁旌表有德媿三遷之語迨其卒而葬也邑人為之立傳作栢舟吟以輓之邑侯白公亦贈輓歌二章人以為榮焉

### 莊氏

莊氏邑儒士趙之健妻太僕莊公會孫女也生而凝重笄年適趙修婦道孝公姑姑病祝天求代泊沒哀毀盡禮夫早逝氏年二十二栢舟自矢日夜拮据養老撫孤子得遊庠苦節四十年壽踰六十而終里人稱之

### 趙氏

趙氏貢士霍爾弘子其有妻也夫亡氏僅二十歲遺腹在身矢志守節及育乃女也勸之者曰汝之所以不改嫁者為此一塊肉耳今復何望無子之節恐悞終身氏日子與女皆亡夫骨血也因無子而他適從一之謂何吾志已決慎無多言于是紡績度日撫養孤女三十三年五十三歲卒

### 劉氏

劉氏生員李冲翰妻自順治十二年夫死無子守節事公至孝撫叔成立前邑令王公給扁旌表曰節義逾韓今夫弟有子承繼氏夫使丈夫無子而有子者氏之力也至今守節三十九年

馬氏

馬氏生員朱道南妻于歸四載夫即早逝遺女二週並無子息彼時年方二十堅貞自守痛夫無嗣以猶子承祧撫養成人子女婚嫁氏皆營構盡禮孝敬公姑和睦妯娌苦節三十年以病卒

東光縣志

卷之七

四十三

霍氏

霍氏武生邢文琰母琰生三月父即見背母時年二十二矢志靡他撫育教訓今得入庠遇姑病篤氏移置己室百方調治姑病尋愈人皆以為孝感所致苦節三十餘年將近六旬此不待沒世而知其事必有終者也

張氏

張氏鄉民趙竹妻竹亡氏年二十一子尚在襁褓家貧如洗氏矢志守節撫養成人迄今七十歲共

計守節五十年雖云身後論定七十老嫗離蓋棺  
不遠村民公舉亦見輿論之公

李氏

李氏邑庠廩生馬之騃側室夫亡年僅十八子幼  
家貧衣食罔給毅然自矢從一而終紡織度口晝  
荻教子迄今四十餘年

孫氏

孫氏柴友檜妻夫亡氏年十八止有一女方七月  
內外無依窮不能舉火躬勤紡績誓死靡他苦節

東光縣志

卷之七

四十四

三十四年後遇寇投河而歿越二日尸出衣冠謹  
飭顏色如生闔邑咸嘆其貞烈云

于氏

于氏處士侯天培妻夫亡氏年十七子方五月撫  
育教訓今得遊庠皆氏之力也矢志靡他人多稱  
之

張氏

張氏青縣室女其父張大流寓東光時年十七已  
許邑人馬德為妻大於得聘次日載女歸籍另圖

厚聘女矢志堅貞竊簪母髻扮為乞婦步返東邑尋問原媒轉語夫家鳴縣關父訊供若轍邑令白公捐給剋裳錢醴當堂配合以未婚室女卽知從一之義且有胆有識亦近世奇女子也

邢氏

邢氏邑民楊三畏妻夫亡氏年二十有一遺孤楊可久尚未週年氏堅志守貞撫兒成立二十年兒又病亡復守幼孫紡績度日撫兩世之孤兒使楊氏之祀不絕皆氏之力也輿論稱之

東光縣志

卷之七

四十五

石氏

石氏故處士馬岳妻夫亡氏年十八子女俱無堅貞守節誓不改遷後廼翁馬中驩為過嗣子馬咸繼視如己出且家貧姑老氏紡績度日孝姑撫子今得成立苦節四十一年卒

李氏

李氏生員程斌妻斌遇兵變身死氏年方二十五歲一子六歲被擄止遺弱女二公姑俱老夫弟珽年方四歲氏奉親撫叔誓死靡他苦節五十二年

而卒蓋棺論定斯人有焉

韓氏

韓氏生員王耀祖妻年二十九耀祖卒月餘始生遺腹子宗人之無良者利其所有迫脅其母子者無不至氏不得已携其子避患母家厥後子稍長迺歸故居理先業不數年田疇廬舍有加於舊遺腹子名卓遊鬻序克亢王氏之宗皆氏之力也邑令陳公扁其門曰節高畫荻僉以爲非溢美云

周氏

周氏處士石廷礎妻自幼無子夫在過本門之姪士粹以承嗣夫歿氏年二十九歲家庭多變欺幻凌孀逼氏改嫁氏持刀斷髮決不他適後教子訓孫家業克保邑令陳公以扁旌之